



Broj/Број: 03/1-50-1-9-11/07
Sarajevo/Сарајево, 11.12.2007.godine

Z A P I S N I K

11. sjednice Zajedničke komisije za odbranu i sigurnost BiH Parlamentarne skupštine BiH, održane 11.12.2007, u vremenu od 11 do 13 sati

Sjednici su prisustvovali članovi Zajedničke komisije: Slobodan Šaraba, Šefik Džaferović, Jozo Križanović, Hazim Rančić, Adem Huskić, Vinko Zorić, Mirko Okolić, Drago Kalabić, Ivo Miro Jović i Dušanka Majkić.

Odsustvo sa sjednice opravdali su: Branko Zrno i Sulejman Tihčić.

Sjednici su prisustvovali i gosti, kao i predstavnici Sekretarijata Parlamentarne skupštine BiH:

- Ranko Ninković, Predsjedništvo BiH;
- Marina Pendeš i Muhamed Smajić, Ministarstvo odbrane BiH;
- Dragan Vukadin, Vedran Mulabdić i Lejla Solunović, Ministarstvo sigurnosti BiH;
- Stela Vasić, Ured predsjedavajućeg Vijeća ministara BiH;
- Dragiša Mekić, Ministarstvo vanjske trgovine i ekonomskih odnosa BiH;
- Esad Suljić i Nijaz Čardaklija, Ministarstvo vanjskih poslova BiH;
- Lejla Hadžihanović, Štab NATO-a u Sarajevu;
- Christian Haupt i Sanja Čatibović, Misija OSCE-a u BiH;
- Dragica Hinić, sekretar Zajedničke komisije za odbranu i sigurnost BiH, Željko Grubešić, savjetnik u Zajedničkoj komisiji za odbranu i sigurnost BiH, i Jovica Katić, stručni saradnik.

Sjednicom je predsjedavao drugi zamjenik predsjedavajućeg Zajedničke komisije Slobodan Šaraba.

Govoreći o dnevnom redu, **Slobodan Šaraba** predložio je da se, zbog značaja i hitnosti rasprave, kao 3. tačka uvrsti Izvještaj o učešću pripadnika Oružanih snaga, policijskih i državnih službenika Bosne i Hercegovine u operacijama podrške miru za period od 1.3. 2007. do 31.8. 2007., s prijedlogom učešća za 2008., te da se u okviru tekućih pitanja, kao posljednje tri tačke razmatraju i Izvještaj o posjeti Štabu NATO-a u Briselu i Glavnoj vojnoj komandi NATO SHAPE – Mons, Informacija o održanoj radionici o temi: "Budžetski prijedlozi institucija odbrambenog i sigurnosnog sektora na nivou Bosne i Hercegovine za 2008. godinu i Poziv Misije OSCE-a u BiH za radnu posjetu lokalnim strukturama Civilne zaštite u Trebinju 21. 12. 2007.

Adem Huskić saglasio se s predloženim dopunama dnevnog reda, te sugerirao da Komisija u okviru današnje sjednice raspravlja i o temama koje su bile aktuelne posljednjih dana u BiH. Konkretno, predložio je da Komisija, ako je moguće na ovoj sjednici, dobije odgovore od predstavnika Ministarstva sigurnosti BiH o velikoj krađi novca koja se desila na sarajevskom aerodromu, te suspenzijama službenika Granične policije na graničnom prijelazu u Doljanima. Ako

to nije moguće, o ovim pitanjima trebalo bi zatražiti informacije i raspravljati o njima na narednoj sjednici Komisije. Također, zanimala ga je i informacija koju je na radionici u Vitezu dao visoki zvaničnik NATO-a o mogućnosti priključenja NATO-u, ako ne naredne godine u Bukureštu, onda 2009., te šta je BiH uradila u međuvremenu na tom planu. Na kraju, izrazio je i nezadovoljstvo činjenicom da ministar sigurnosti BiH još nijednom nije prisustvovao sjednicama Zajedničke komisije.

Vinko Zorić predložio da se u okviru Tekućih pitanja „podtačka a) Rezolucija Vijeća sigurnosti UN o situaciji u Bosni i Hercegovini“ skine s dnevnog reda, s obzirom da je podijeljena na engleskom jeziku, bez prijevoda na jezike koji su u službenoj upotrebi u BiH.

Ovaj prijedlog prihvaćen je sa četiri glasa "za", jednim glasom "protiv" i dva "suzdržana" glasa.

Slobodan Šaraba je, rezimirajući prijedloge za izmjenama dnevnog reda, predložio da se informacije vezane za pljačku na sarajevkom aerodromu i suspenzijama predstavnika Granične policije u Doljanima zatraže pisanim putem od Ministarstva sigurnosti BiH, s obzirom da su se predstavnici Ministarstva sigurnosti BiH koji prisustvuju ovoj sjednici izjasnili da ne mogu dati odgovore na ova pitanja, te da se ove informacije razmatraju na narednoj sjednici Zajedničke komisije.

Također, predložio je da se Ministarstvu sigurnosti BiH uputi zamjerka zbog učestalog neprisustva kompetentnih lica, koja su, u skladu s poslovničkim odredbama, dužna prisustvovati sjednicama Zajedničke komisije, i to u najnižem rangu podrazumijeva pomoćnika ministra. Ministarstvu sigurnosti BiH naznačit će se da ubuduće Komisija neće razmatrati materijale, čiji je predlagач Ministarstvo, ako ove odredbe Poslovnika ne budu ispoštovane.

Nakon rasprave, članovi Zajedničke komisije jednoglasno su usvojili sljedeći

DNEVNI RED

1. Usvajanje Zapisnika 10. sjednice Zajedničke komisije;
2. Razmatranje Prijedloga zakona o izmjenama Zakona o učešću pripadnika Oružanih snaga BiH, policijskih službenika, državnih službenika i ostalih zaposlenika u operacijama podrške miru i drugim aktivnostima u inozemstvu – prva komisijska faza (predlagач: Vijeće ministara BiH);
3. Izvještaj o učešću pripadnika Oružanih snaga, policijskih i državnih službenika Bosne i Hercegovine u operacijama podrške miru za period od 1.3. 2007. do 31. 8. 2007., s prijedlogom učešća za 2008. (podnosilac: Predsjedništvo BiH);
4. Informacija o izdatim dozvolama za promet oružja, vojne opreme i proizvoda dvojne namjene u 2006. godini (podnosilac: Ministarstvo vanjske trgovine i ekonomskih odnosa BiH);
5. Rasprava o dostavljenim odgovorima nadležnih ministarstava na pitanja postavljena na 7. sjednici Zajedničke komisije za odbranu i sigurnost, 8. 10. 2007.;
6. Tekuća pitanja:
 - a) Izvještaj sa 7. cetinjskog parlamentarnog foruma, od 18. do 20.11.2007.,
 - b) Informacija o posjeti ambasadora Švicarske u BiH N.J.E. Rolfa Lenza,
 - c) Informacija o posjeti delegacije Potkomisije za sigurnost i odbranu Evropskog parlamenta,
 - d) Informacija o posjeti članova Komisije za odbranu i sigurnost Parlamenta Slovačke Republike,
 - e) Izvještaj o posjeti Štabu NATO-a u Briselu i Glavnoj vojnoj komandi NATO SHAPE–Mons,
 - f) Informacija o održanoj radionici o temi: "Budžetski prijedlozi institucija odbrambenog i sigurnosnog sektora na nivou Bosne i Hercegovine za 2008. godinu,
 - g) Poziv Misije OSCE-a u BiH za radnu posjetu lokalnim strukturama Civilne zaštite u Trebinju 21. 12. 2007.

Predloženi izmijenjeni dnevni red članovi Zajedničke komisije jednoglasno su usvojili.

Ad. 1. Usvajanje Zapisnika 10. sjednice Zajedničke komisije

U okviru rasprave o Zapisniku 10. sjednice **Hazim Rančić** osvrnuo se na dio Zapisnika u kojem se govori o razlozima odbijanja Prijedloga zakona o izmjenama i dopunama Zakona o SIPA-i, ističući drugi razlog koji navodi mišljenje da je organizaciono premještanje NCB Interpola iz Ministarstva sigurnosti BiH u SIPA-u neustavno i kao takvo neprihvatljivo. Osporio je navođenje nesistematčnosti kao razlog odbijanja, pogotovo što su ustavnopravne komisije oba doma PSBiH utvrdile valjan ustavnopravni osnov i time ga uputile u daljnju proceduru. Stoga ovaj razlog ne smije stajati kao razlog odbijanja Prijedloga zakona i predložio je da, prema tome, kao razlog odbijanja Prijedloga zakona bude naveden samo razlog koji je prvi naveden.

Sekretar Komisije Dragica Hinić objasnila je da je predsjedavajući Komisije Branko Zrno, koji trenutno nije prisutan, bio mišljenja da je i ovo bio jedan od razloga odbijanja predloženog zakona.

Jozo Križanović podržao je diskusiju Hazima Rančića, navodeći da na ovoj sjednici razlog neustavnosti nije bio razmatran kao jedan od razloga odbijanja ovog prijedloga zakona. Kao osnovni razlog odbijanja naveo je stav Komisije da neophodno sačekati donošenje Zakona o plaćama zaposlenih u institucijama BiH, koji je bio vezan za isplate određenih naknada, stimulacija i drugih novčanih izdvajanja državnim službenicima u SIPA-i.

Vinko Zorić naglasio je da u Zapisniku u suštini nije ništa netačno konstatirano, jer je jasno navedeno da jedan dio članova, a ne svi članovi stoje iza navedenog razloga odbijanja.

Drago Kalabić konstatirao je da odluka Komisije o predloženom zakonu ni u kom slučaju nije sporna, bez obzira na navedene razloge odbijanja. Predložio je da se usvajanje Zapisnika 10. sjednice prolongira za narednu sjednicu, s obzirom da će predsjedavajući Komisije tada biti prisutan, i moći će eventualno dati odgovor.

Slobodan Šaraba predložio je da se do sljedeće sjednice Zajedničke komisije odgodi izjašnjavanje o Zapisniku 10. sjednice.

Ovaj prijedlog članovi Komisije prihvatili su sa šest glasova "za" i dva "suzdržana glasa".

Ad.2. Razmatranje Prijedloga zakona o izmjenama Zakona o učešću pripadnika Oružanih snaga BiH, policijskih službenika, državnih službenika i ostalih zaposlenika u operacijama podrške miru i drugim aktivnostima u inozemstvu – prva komisijska faza (predlagač: Vijeće ministara BiH)

I. Razmatranje Prijedloga zakona u prvoj komisijskoj fazi

Slobodan Šaraba informirao je da bi Komisija na ovoj sjednici trebalo da razmatra principe Prijedloga zakona. Pošto je konstatirano da na sjednici nema prisutnih ovlaštenih predstavnika predlagača, predložio je da se ova tačka skine s dnevnog reda.

Dužanka Majkić predložila je zaključak kojim bi se stručna služba Zajedničke komisije za odbranu i sigurnost zadužila da se, prije održavanja svake naredne sjednice Komisije, informira u nadležnim ministarstvima o tome da li će njihovi predstavnici prisustvovati sjednici, te da se ubuduće ni o jednoj tački dnevnog reda ne raspravlja ako nema jasne potvrde o prisustvu predstavnika tog ministarstva. Razlog donošenja ovakvog zaključka jeste da se ubuduće ne bi dešavale slične situacije da prilikom izjašnjavanja o nekom zakonskom prijedlogu nije prisutan predlagač.

Ivo Miro Jović iznio je mišljenje da je dovoljno da ministarstvo bude samo informirano o tome da će prijedlog njihovog akta biti tačka dnevnog reda, čime su oni, saglasno svojim propisanim obavezama, dužni pratiti njegovu sudbinu do kraja. Prioritetan zadatak je da ovi predstavnici budu na sjednicama Komisije jer bi se nastavljanjem sadašnje prakse Komisija mogla sastajati jednom u pola godine.

Adem Huskić podržao je stav Jovića i predložio da Komisija nakon ove sjednice o neprisustvu ovlaštenog predlagača obavijesti kolegij oba doma Parlamentarne skupštine BiH.

Vinko Zorić podržao je prijedlog zaključka Dušanke Majkić, ali i istakao da nije za to da se ovaj zakon skinе s dnevnog reda sjednice. On je naveo da javnost često kritizira i proziva rad Parlamentarne skupštine BiH zbog njene neefikasnosti, ne njenom krivicom.

Slobodan Šaraba najprije je objasnio kako je i do sada praksa Komisije bila da postupa na ovakav način i izrazio bojazan da bi, ako bi se sada Prijedlog zakona razmatrao, mogli doći u situaciju da predlagači ubuduće uopće neće imati obavezu da dolaze na sjednice Zajedničke komisije. Potom je pozvao Komisiju da se izjasni o prijedlogu zaključka koji je iznijela Dušanka Majkić. Komisija je, sa pet glasova "za", dva glasa "protiv" i jednim "suzdržanim"glasom, usvojila navedeni zaključak.

Neposredno prije izjašnjavanja Komisije o prijedlogu Slobodana Šarabe o skidanju današnje tačke s dnevnog reda, na sjednicu su došli predstavnici Ministarstva odbrane BiH. Članovi Zajedničke komisije saglasili su se da se Prijedlog zakona ipak razmatra na ovoj sjednici.

Muhamed Smajić izvinio se prisutnim članovima Komisije za kašnjenje na sjednicu. On je u svom kratkom izlaganju rekao samo da se u Prijedlogu izmjena i dopuna ovog zakona radi o usklađivanju Zakona o službi u Oružanim snagama BiH, te da su obrazloženja ovog zakona jasna i da oni, kao nadležni predstavnici, stoje na raspolaganju za sva pitanja u vezi s ovim zakonom.

Slobodan Šaraba konstatirao je da se niko nije prijavio za diskusiju i zamolio predlagače Zakona da ubuduće vode računa o vremenu održavanja sjednice Komisije. Potom je pozvao prisutne članove Komisije da se izjasne o principima Prijedloga zakona.

Odlučivanje

Komisija je, sa šest glasova "za" i dva "suzdržana, bez glasova "protiv", usvojila principe Prijedloga zakona o izmjenama Zakona o učešću pripadnika Oružanih snaga BiH, policijskih službenika, državnih službenika i ostalih zaposlenika u operacijama podrške miru i drugim aktivnostima u inozemstvu, te svoje mišljenje uputila u daljnju parlamentarnu proceduru.

Ad.3. Izvještaj o učešću pripadnika Oružanih snaga, policijskih i državnih službenika Bosne i Hercegovine u operacijama podrške miru za period od 1. 3. 2007. do 31. 8. 2007., s prijedlogom učešća za 2008. (podnosilac: Predsjedništvo BiH)

Dragan Vukadin iz Ministarstva sigurnosti BiH dao je uvodne napomene o ovom izvještaju. On je izrazio nadu da će broj ovih pripadnika u 2008. biti identičan broju iz 2007. godine.

Slobodan Šaraba osvrnuo se na zaključke koji su sastavni dio ovog izvještaja. On je konstatirao da član 19. Zakona uopće ne razmatra pitanja koja su navedena u posljednjem zaključku. On je, također, u vezi s navedenim zaključkom, pitao na koji rok se upućuju službenici u združenu misiju UNAMID u Sudan. Naveo je i to da su u ovom izvještaju, za razliku od prethodnih, dati samo njegovi pozitivni aspekti, izražavajući nezadovoljstvo činjenicom da nisu navedeni i negativni. Konstatirao je da je Izvještaj Zajedničkoj komisiji dostavljen sa izuzetno velikim zakašnjenjem, izražavajući svoje nezadovoljstvo tom činjenicom.

Vinko Zorić dotakao se pitanja ravnopravnosti spolova i zastupljenosti žena u misiji, prikazanog na 9. strani, u kojem se govori da su dvije pripadnice ženskog spola bile raspoređene u UNMIL mirovnoj misiji, te da je mandat bh. policijskim službenicima završio u ovom izvještajnom periodu, tako da više nema pripadnica ženskog spola u mirovnim misijama. On je, kao član ove komisije i kao predsjedavajući Komisije za ostvarivanje ravnopravnosti spolova, postavio pitanje zašto je to tako.

Jozo Križanović istakao je da Izvještaj kasni u odnosu na odredbe Zakona koji regulira ova pitanja, te pitao koliko on kasni, zbog čega i koliko zaista postoje objektivni razlozi za ovo kašnjenje. Ako zaista postoje objektivni razlozi za kašnjenje, a kako se ne bi ponavljala situacija sa stalnim kršenjem zakonskih odredbi, sugerirao je eventualne promjene Zakona u dijelu koji definira obavezu Vijeća ministara BiH i Predsjedništva BiH o izvještavanju Parlamentarne skupštine BiH u datim rokovima.

Ivo Miro Jović izrazio je nezadovoljstvo što se na ovoj sjednici konstantno priča o mirovnoj misiji, a niko ne spominje ljudski faktor. Volio bi znati šta se dešava s ljudima koji čine te mirovne misije, da li su dovoljno obučeni, opremljeni, kako se oni tamo osjećaju i kakva je saradnja s drugim pripadnicima misija. On je istakao da u ovom izvještaju ne stoji ništa o njima, a oni predstavljaju najvažniji njegov element.

Adem Huskić predložio je da, prilikom naredne rotacije pripadnika Oružanih snaga BiH iz Iraka, predstavnici Ministarstva odbrane BiH i Zajedničke komisije za odbranu i sigurnost održe zajednički sastanak s licima koja su bila pripadnici ove misije, kako bi u direktnom razgovoru s ljudima vidjeli da li su tokom njihovog boravka u misiji imali bilo kakvih problema i o kojim se problemima radi. On je istakao da su se članovi Zajedničke komisije prilikom posjete našim trupama u Iraku mogli uvjeriti u dobro stanje i atmosferu koja tamo vlada, ali da nije siguran da li je stanje ostalo isto sve do završetka njihove misije. Zanimalo ga je također pod kojim oznakama u misije idu pripadnici entitetskih policija, na što mu je odgovoreno da idu s entitetskim oznakama.

Mirka Okolića zanimalo je da li se bh. pripadnici u mirovne misije upućuju na dobrovoljnoj osnovi ili moraju u njih ići u okviru službe? Istakao je da je došao do saznanja da Ministarstvo odbrane BiH raspolaže većim brojem kandidata od broja lica koja treba da budu upućena u inozemstvo, te zamolio ministricu da mu potvrdi istinitost tih tvrdnji.

Hazim Rančić naveo je da su nesporna prva tri zaključka koji se nalaze na posljednjoj stranici ovog izvještaja. Analizirajući posljednji, četvrti zaključak, postavio je pitanje da li već postoji stav Vijeća ministara BiH kojim je ono zadužilo Ministarstvo sigurnosti BiH da, u skladu s članom 19. Zakona o učešću pripadnika Oružanih snaga BiH, policijskih službenika, državnih službenika i ostalih zaposlenika u operacijama podrške miru i drugim aktivnostima u inozemstvu pokrene proceduru za odobrenje učešća i raspoređivanja policijskih službenika BiH u združenu misiju UNAMID u Sudanu. Ako ovaj stav Vijeća ministara BiH već postoji, onda ne postoji razlog za donošenje ovakvog zaključka. Ako on, pak, ne postoji, onda bi Zajednička komisija i Parlamentarna skupština BiH trebalo da usvojiti i ovaj zaključak.

Marina Pendeš, zamjenica ministra odbrane BiH, najprije se izvinila prisutnim članovima Komisije zbog kašnjenja, a zatim pokušala sublimirati odgovore na sva pitanja i diskusije do kojih se došlo pri razmatranju ovog izvještaja. Odgovarajući na konstataciju Slobodana Šarabe o negativnim aspektima, istakla je da Ministarstvo odbrane BiH, radeći na ovom izvještaju zajedno s članovima Interresorne grupe za izradu redovnog izvještaja, koju, osim ovog ministarstva, čine još i Ministarstvo sigurnosti BiH, Ministarstvo finansija i trezora BiH i Ministarstvo vanjskih poslova BiH, nije moglo donijeti bilo kakav zaključak koji bi imao negativan kontekst učešća bh. pripadnika u mirovnim misijama u inozemstvu. U vezi s pitanjem Vinka Zorića, istakla je da je to rezultat nedovoljne zastupljenosti inače u resornim ministarstvima, te u činjenici da se u mirovne misije odlazi na dobrovoljnoj osnovi. Mišljenja je da bi se ovakvo stanje moglo dijelom popraviti nakon provođenja Odluke Predsjedništva BiH, te izrazila nadu da će kod žena ubuduće izazvati zainteresiranost za ove misije. Dajući odgovor na pitanje Joze Križanovića, objasnila je da je primarni razlog kašnjenja ovog Izvještaja, koje iznosi dva i po mjeseca, taj što Ministarstvo odbrane već nekoliko posljednjih mjeseci neuspješno pokušava organizirati zajednički sastanak sa Predsjedništvom BiH, na kojem bi se razgovaralo o eventualnom proširenju mirovnih misija u inostranstvo. Kao drugi navela je ostavku Vijeća ministara BiH, koje je također trebalo usvojiti Izvještaj. Na pitanje Ive Mire Jovića odgovorila je da Ministarstvo svakodnevno dobija izvještaje sa terena i da do sada u tim njima nisu bili evidentirani nikakvi problemi. Naglasila je i to da predstavnici Ministarstva tokom misije nastoje posjetiti trupe koje se nalaze na terenu, a u posljednjoj takvoj posjeti su prisustvovali i članovi Zajedničke komisije za odbranu i sigurnost. U vezi rasprave Adema Huskića, rekla je da uopće nije problem organizovati zajednički sastanak u Ministarstvu odbrane na kojem se može razgovarati o eventualnim problemima s kojima se personal u ovim misijama susreće.

U odnosu na pitanje Mirka Okolića istakla je da su svi pripadnici u mirovne misije do sada upućivani po dobrovoljnoj osnovi, a za to postoje dva razloga: jer su svi oni prošli specijalističku obuku koja se traži za njihovo upućivanje u ove misije, te taj što su one finansijski primamljive. Novina u daljnjem upućivanju bh.pripadnika u mirovne misije je ta što će oni od sada biti

upućivani, između ostalog, i na osnovu rezultata testiranja koje će provoditi Ministarstvo odbrane BiH. Zaključujući odgovor na pitanje Mirka Okolića, potvrdila je njegove informacije da se Ministarstvo susreće sa većim brojem kandidata od broja ljudi koji treba da se upute u mirovne misije.

Jozo Križanović dao je kratku opasku da je potpuno razumljivo da je kod ovog izvještaja bio problem komunikacije između Ministarstva odbrane BiH i Predsjedništva BiH i postavio pitanje da li sada Parlamentarna skupština BiH razmatrajući ovaj izvještaj ignorira Zakon.

Ratko Ninković naglasio je da i Predsjedništvo BiH ima velikih problema kada su u pitanju rokovi. Izvještaj koji je danas na dnevnom redu je mnogo ranije trebao biti na sjednici Vijeća ministara BiH, a ono nije zasjedalo. To se nadalje odrazilo na rotacije u redovnim misijama, pa tako Predsjedništvo BiH danas već ima probleme s redovnom rotacijom u DR Kongu. Na kraju, Ninković se saglasio s konstatacijom Slobodana Šarabe da posljednji zaključak u Izvještaja treba izbaciti.

Nijaz Čardaklija iz Ministarstva vanjskih poslova BiH naglasio je da je ovo prvi put da do kašnjenja dolazi zbog Ministarstva odbrane BiH. Najčešći razlozi kašnjenja do sada su bili posljedica prikupljanja informacija s terena u vezi s policijskim službenicima, na entitetskom nivou, koje je vršilo Ministarstvo sigurnosti BiH. On je zaključio da veliki broj subjekata učestvuje u donošenju ovakvog izvještaja, te da je to glavni razlog ovolikog kašnjenja.

Slobodan Šaraba je, sublimirajući raspravu vezanu za ovaj izvještaj, Zajedničkoj komisiji za odbranu i sigurnost predložio sljedeće

ZAKLJUČKE

1. Konstatirano je da je Izvještaj ponovno dostavljen sa znatnim zakašnjenjem, te je izraženo nezadovoljstvo nepoštivanjem rokova izvještavanja od strane nadležnih institucija, što se treba promijeniti u narednom periodu;
2. Od nadležnih ministarstava i predlagača izvještaja zahtijeva se da u narednom periodu sadrže i relevantne informacije vezane za svakodnevne uslove rada i života pripadnika mirovnih misija u inozemstvu.
3. Od Ministarstva odbrane BiH zahtijeva se da u narednom periodu organizira sastanak na kojem će pripadnici OSBiH, koji su već učestvovali u operaciji podrške Koalicionim snagama u Iraku, direktno upoznati članove Zajedničke komisije o stvarnom stanju naše jedinice i njenih pripadnika u ovoj misiji.

Komisija je jednoglasno prihvatila navedene zaključke.

Uz konstataciju da se iz Izvještaja treba isključiti posljednji, četvrti zaključak, na 20. strani, Zajednička komisija za odbranu i sigurnost je, sa osam glasova „za“ i jednim glasom „protiv“, usvojila Izvještaj o učešću pripadnika Oružanih snaga, policijskih i državnih službenika BiH u operacijama podrške miru za period od 1. 3. 2007. do 31. 8. 2007., s prijedlogom učešća za 2008. godinu, predlagača Predsjedništva BiH, te svoje mišljenje uputila u daljnju parlamentarnu proceduru.

Ad.4. Informacija o izdatim dozvolama za promet oružja, vojne opreme i proizvoda dvojne namjene u 2006. godini (podnosilac: Ministarstvo vanjske trgovine i ekonomskih odnosa BiH)

Dragiša Mekić iz Ministarstva vanjske trgovine i ekonomskih odnosa BiH dao je uvodne napomene istaknuvši da se radi o redovnoj proceduri izvještavanja u kojoj Ministarstvo informacije dostavlja na usvajanje Parlamentarnoj skupštini BiH, u skladu sa Zakonom o izvozu i uvozu oružja i vojne opreme i kontrole prometa proizvoda dvojne namjene. Osim Parlamentarnoj skupštini BiH, Ministarstvo je ovu informaciju dostavilo i odgovarajućim predstavnicima međunarodne zajednice.

Svi podaci u ovoj informaciji su konkretno i transparentno prikazani. Ono što karakterizira ovu informaciju u odnosu na protekle godine jeste bitan pad u izvozu oružja i vojne opreme, čija je ukupna vrijednost u 2006. iznosila 50.288.873 eura. Uvoz oružja i vojne opreme je, također, zabilježio izvjestan pad i on je u 2006. godini iznosio 12.666.237 eura.

U svom izlaganju naglasio je još i činjenicu da će naredne godine Zajedničkoj komisiji ova informacija biti dostavljena mnogo ranije, jer je Ministarstvo za ove potrebe instaliralo novi softver u koji se već redovno ubacuju podaci koji će biti zastupljeni u budućim informacijama.

Slobodan Šaraba konstatirao je da nema prijavljenih za raspravu, te pozvao članove Komisije da se izjasne o Informaciji.

Zajednička komisija za odbranu i sigurnost potom je jednoglasno usvojila Informaciju o izdatim dozvolama za promet oružja, vojne opreme i proizvoda dvojne namjene u 2006. godini.

Ad.5. Rasprava o dostavljenim odgovorima nadležnih ministarstava na pitanja postavljena na 7. sjednici Zajedničke komisije za odbranu i sigurnost, 8. 10. 2007.

Slobodan Šaraba otvorio je raspravu po dostavljenim odgovorima od nadležnih ministarstava. Osvrnuo se na pitanje broj 2. koje se odnosi na potvrđivanje Odluke o utvrđivanju kandidata za generalske pozicije, konstatirajući da je Odlukom Predsjedništva BiH određeno sedam lica na ove pozicije, a privremeno osporeno imenovanje jednog kandidata, kako bi se provele dodatne provjere. Naglasio je da je neozbiljno da sedam lica, koja su ispunila zakonski predviđene kriterije, čeka na imenovanje na generalske pozicije radi provjere samo jednog lica.

Šefik Džaferović osvrnuo se na pitanje broj 5., koje se odnosi na nedostavljanje mjesečnog izvještaja o tranziciji od ministra odbrane BiH. On je zamolio da se ove informacije redovno dostavljaju Zajedničkoj komisiji, imajući u vidu njeno opredjeljenje da bude redovno informirana o provođenju Zakona o odbrani BiH i Zakona o službi u oružanim snagama BiH, kako bi, na osnovu dostavljanja ovih izvještaja, mogla ih redovno pratiti i pomoći Ministarstvu u onim sferama gdje problemi po ovim pitanjima budu nastajali.

Jozo Križanović komentirao je odgovor koji je Ministarstvo odbrane BiH dalo na 4. pitanje vezano za nezavršeni prijenos pokretne i nepokretne imovine u oblasti odbrane. Konstatirao je da se Ministarstvo potrudilo odgovoriti na ovo pitanje, s obzirom da je ovo jedan od bitnijih problema s kojim se ono susreće, ali je izrazio nezadovoljstvo njegovim sporim rješavanjem. Poznato je da je Vijeće ministara BiH u ostavci, ali ne postoji opravdanje za ignoriranje rješavanja ovog problema, s obzirom da pitanje ove imovine dodatno opterećuje troškove Ministarstva odbrane BiH. On je zaključio da se, bez obzira na trenutno stanje u Vijeću ministara BiH, treba održati sastanak i zajedno s nadležnim institucijama riješiti ova pitanja. On je zamolio prisutne predstavnike Ministarstva da mu daju nešto više informacija o ovom pitanju od ovdje dostavljenog odgovora. Osvrćući se na pitanje Šefika Džaferovića, konstatirao je da se, govoreći o Stručnom timu za provođenje tranzicije, stvara dojam da je taj tim suvišan i da od njega ima više štete nego koristi, te u tom smjeru inicirao da se izvrše izmjene Zakona o odbrani BiH u dijelu koji tretira pitanje uspostavljanja ovog stručnog tima.

Željko Grubešić istakao je da pitanje problema rješavanja imovine koči dalje procese BiH, te pitao predstavnike Ministarstva odbrane BiH da li postoji mogućnost da Vijeće ministara BiH ubrza rješavanje ovih pitanja.

Mirko Okolić pridružio se diskusijama svojih prethodnika i konstatirao da radna grupa koja radi na rješavanju pitanja imovine u oblasti odbrane ima zaista složen posao i da niko ne želi kazati jasno za koliko će vremena on biti obavljen. I on je zatražio odgovor na pitanje ko u tom lancu koči ovaj proces, gdje leži problem i koja nam institucija, odnosno pojedinac pravi smetnju u rješavanju ovog pitanja?

Marina Pendeš istakla je da očekuje da Sporazum o konačnom raspolaganju svim pravima i obavezama na pokretnoj imovini, koja će i dalje služiti potrebama odbrane, potpišu predsjedavajući Vijeća ministara BiH i entitetski premijeri do kraja ove godine. Naglasila je da Ministarstvo odbrane BiH čini maksimum napora po ovim pitanjima, te da je dio odgovornosti prvenstveno na

entitetskim vladama i zaključila kako Ministarstvo ne raspolaže sa više informacija od navedenih. Odgovarajući jednim dijelom i na pitanje Željke Grubešića i Mirka Okolića, naglasila je da je pitanje imovine jako bitno pitanje za Ministarstvo odbrane BiH, koje iziskuje i finansijska sredstva i ljude koji rade na ovim pitanjima. Ona je navela da će u narednom periodu biti potrebna i veća politička podrška kako bi se određena pitanja vezana za ove probleme riješila. Saglasila se s konstatacijom da je Stručni tim za provođenje tranzicije postao nepotreban, ali je navela da je njegovo postojanje predviđeno prijelaznim i završnim odredbama Zakona, a ne samim Zakonom, te u skladu s tim konstatirala da nema potrebe za izmjenom Zakona. Odgovarajući na diskusiju Šefika Džaferovića, Marina Pendeš istakla je da će Ministarstvo odbrane BiH Zajedničkoj komisiji pravovremeno dostavljati ove izvještaje s ciljem rješavanja eventualnih problema koji bi se mogli javljati na pitanjima tranzicije.

Ranko Ninković je, dajući odgovor na pitanje Slobodana Šarabe, istakao da će Predsjedništvo BiH već na narednoj sjednici donijeti ili novu odluku o utvrđivanju kandidata na generalske pozicije u OSBiH ili će izvršiti izmjenu i dopunu postojeće odluke kako bi se pitanje njihovog imenovanja što prije konačno riješilo.

Slobodan Šaraba, zaključujući raspravu o ovim pitanjima, zahvalio se nadležnim ministarstvima na dostavljenim odgovorima, te dodatnim datim obrazloženjima po postavljenim pitanjima tokom rasprave.

Ad.6. Tekuća pitanja

a) Izvještaj sa 7. cetinjskog parlamentarnog foruma, od 18.do 20.11.2007.

Izvještaj sa 7. cetinjskog parlamentarnog foruma, održanog od 18. do 20.11.2007. prihvaćen je jednoglasno.

b) Informacija o posjeti ambasadora Švicarske u BiH N.J.E. Rolfa Lenza

Članovi Zajedničke komisije su prilikom razmatranja ove informacije vodili raspravu vezanu za njen posljednji pasus, u kojem se govori o spremnosti švicarske vlade da i dalje daje značajnu pomoć u tehničkom opremanju Zajedničke komisije za odbranu i sigurnost BiH kada se Zajedničkoj komisiji dodijele uslovne prostorije za rad.

Slobodan Šaraba predložio je da Zajednička komisija uputi zaključak Vijeću ministara BiH u smislu da se posao oko preseljenja ministarstava u novu zgradu ubrza, s obzirom da on traje već pola godine.

Duškanka Majkić istakla je da ne treba upućivati bilo kakve molbe Vijeću ministara BiH vezane za dobivanje prostorija koje svakako pripadaju Parlamentarnoj skupštini BiH. Ona je naglasila da o ovim pitanjima već na narednoj sjednici treba raspravljati Zajednička komisija za administrativne poslove, te zato treba sačekati rezultate rasprave te komisije.

Mirko Okolić također je bio mišljenja da treba sačekati da Zajednička komisija za administrativne poslove završi svoju sjednicu po ovom pitanju i donese zaključke, te poslije toga eventualno postaviti poslaničko pitanje Vijeću ministara BiH zbog čega postoje toliki otpori pri njihovom preseljenju u nove prostorije. Naglasio je da raspravu o ovom pitanju treba uputiti i prema kolegijima oba doma, te da se ovo pitanje neće riješiti sve dok ono ne bude tačka dnevnog reda na sjednicama domova. Predložio je da se kolegijima uputi dopis u kojem bi se, prilikom iseljenja ministarstava iz ove zgrade, Zajedničkoj komisiji za odbranu i sigurnost osigurao adekvatan prostor za njen rad.

Hazim Rančić istakao je da je prije nešto više od mjesec dana Klub Bošnjaka u Domu naroda PSBiH od kolegija oba doma tražio da se ovo pitanje nađe na dnevnom redu sjednica. Predložio je da se stavovi koji su ovdje zastupljeni iznesu i izglasaju u klubovima poslanika i delegata u oba doma, kako bi Parlamentarna skupština BiH jedinstveno nastupila po ovom pitanju.

Šefik Džaferović izrazio je zadovoljstvo što se ovakvo pitanje otvorilo, iako se o njemu raspravlja pri razmatranju Informacije o posjeti ambasadora Švicarske u BiH. On je ipak izrazio zabrinutost

mogućom činjenicom da je Vijeće ministara BiH, i pored svega, već donijelo određene odluke po ovom pitanju, koje bi mogle stvarati probleme pri rješavanju ovog pitanja, te naglasio da donošenje takvih odluka treba provjeriti. Prema informacijama s kojima on raspolaže, Vijeće ministara BiH će zadržati 16 kabineta u zgradi Parlamentarne skupštine BiH. Rekao je da se s ovakvom odlukom ne slaže jer se sva ministarstva i resorni ministri moraju preseliti i biti smješteni u istoj zgradi. Ovakav zaključak treba uputiti i prema Zajedničkoj komisiji za administrativne poslove. On smatra da u zgradi PSBiH, uz Parlamentarnu skupštinu BiH, mogu biti smješteni samo još kabinet predsjedavajućeg Vijeća ministara BiH i eventualno Centralna izborna komisija BiH, kao institucija koja je odgovorna za provođenje izbornih rezultata. Zaključio je da Zajednička komisija treba uputiti dopis kolegijima domova u kojem će ih obavijestiti o postojećoj navedenoj situaciji vezanoj za uslove rada Zajedničke komisije, te obavijestiti Zajedničku administrativnu komisiju, koja bi trebalo da povede računa o ovom pitanju i eventualno predloži domovima zaključak o obavezi što hitnijeg preseljenja ministarstava i ministara u svoju zgradu.

Navedeni prijedlog zaključaka Šefika Džaferovića članovi Zajedničke komisije jednoglasno su usvojili.

c) Informacija o posjeti delegacije Potkomisije za sigurnost i odbranu Evropskog parlamenta

Članovi Zajedničke komisije primili su k znanju Informaciju o posjeti delegacije Potkomisije za sigurnost i odbranu Evropskog parlamenta.

d) Informacija o posjeti članova Komisije za odbranu i sigurnost Parlamenta Slovačke Republike

Članovi Zajedničke komisije primili su k znanju Informaciju o posjeti članova Komisije za odbranu i sigurnost Parlamenta Slovačke Republike.

e) Izvještaj o posjeti Štabu NATO-a u Briselu i Glavnoj vojnoj komandi NATO-a SHAPE–Mons

Izvještaj o posjeti Štabu NATO-a u Briselu i Glavnoj vojnoj komandi NATO SHAPE–Mons prihvaćen je jednoglasno.

f) Informacija o održanoj radionici o temi: "Budžetski prijedlozi institucija odbrambenog i sigurnosnog sektora na nivou Bosne i Hercegovine za 2008. godinu"

Članovi Zajedničke komisije primili su k znanju Informaciju o održanoj radionici o temi: "Budžetski prijedlozi institucija odbrambenog i sigurnosnog sektora na nivou Bosne i Hercegovine za 2008. godinu."

g) Poziv Misije OSCE-a u BiH za radnu posjetu lokalnim strukturama Civilne zaštite u Trebinju 21. 12. 2007.

Komisija je donijela zaključak da se u radnu posjetu lokalnim strukturama Civilne zaštite u Trebinju, 21. 12. 2007., upute Slobodan Šaraba, Dragica Hinić, Željko Grubešić i Jovica Katić.

Zapisnik sačinila
Dragica Hinić

Predsjedavajući
Zajedničke komisije
Branko Zrno